

# **REGOLAMENT PAL ACÈS AI DOCUMENTS AMINISTRATÎFS**

## **Art. 1**

### **OGJET**

1. La Provincie di Pordenon, par sigurâ la transparence de ativitât amministrative e par judânt il davuelziment imparziâl, cun chest regolament e discipline i mûts di esercizi e i câs di esclusion dal drit di acès, ancje a mieç telematic, ai documents amministratîfs, daûr de leç dai 7 Avost dal 1990, n. 241, cui gambiamenti puartâts de leç dai 11 di Fevrâr dal 2005, n.15 e dal DPR dai 12 di Avrîl 2006, n. 184.

## **Art. 2**

### **CJAMP DI APLICAZION**

1. Il drit di acès ai documents amministratîfs lu esercite viers la Amministrazion Provinciâl cui che al à un interès diret, vêr e urgent, une situazion tutelade de leç e leade al document ogjet di interès.
2. Al devente document amministratîf dut ce che al è raprezentazion grafiche, fotocinematografiche, elettromagnetiche o ogni altri supuart di ats, ancje internis, formâts de Amministrazion o, dut câs, doprâts ai fins de ativitât amministrative, che a vedin o no nature publicistiche o privatistiche.
3. Il drit di acès si esercitilu cul cjapâ vision e cu la estrazion di copie dai documents amministratîfs che a esistin pardabon al moment che si ju domande e custodîts simpri de Amministrazion.
4. No son ametudis domandis di acès cu la finalitât di controlâ in gjenerâl il lavôr de Amministrazion. La Amministrazion no je tignude a elaborâ dâts in so possès cul fin di contentâ lis domandis.
5. Al vâl il D.Lgjs. dai 19 di Avost dal 2005, n.195 tal câs che al vegni demandât l'acès a informazions ambientâls come che al stabilis l'art.2 di chel stes D.Lgjs.

### **Art. 3**

#### **GARANZIIS RELATIVIS AL ESERCIZI DAL DIRIT**

1. Se la Aministrazion e ves di individuâ sogjets che, daûr di ce che al conten il document o i documents domandâts in vision, a podaressin lâ in contrast cui interessâts, e scuen visâ chescj sogjets che il procediment di acès al è inviât, cul mandâur une copie a mieç di racomandade cun avîs di riceviment, o par vie telematiche, a chei che a àn dât il lôr consens a cheste forme di comunicazion.
2. Si intindin come sogjets “cuintrinteressâts”, daûr de L. 241/90, ducj chei che a viodaressin violât il lôr dirit a la riservatece pe nature dal document domandât.
3. I cuintrinteressâts a puedin motivâ la lôr oposizion, ancje par vie telematiche, a la domande di acès, dentri di dîs dîs dal riceviment.
4. Passâts i dîs dîs, come che e jeasure che la comunicazion e je rivade, la Aministrazion e decît in merit a la domande di acès.
5. Il dirit di acès, une volte che la domande e ven acetade, al vâl ancje par chei altris documents che a vegnin riclamâts di chel procediment e che a son part dal procediment stes, fûr che tes ecezions par leç.
6. Ai fins de massime informazion pussibil su lis modalitâts e su lis garanziis di esercizi dal dirit di acès, l'Ent public al slargje la publicazion di chest regolament cun plui mieçs, ancje sui sîts telematics pal public.

### **Art. 4**

#### **ACÈS INFORMÂL**

1. Se la nature dal document domandât no clame dongje nissun cuintrinteressât, il dirit di acès al pues jessi esercitât in vie informâl a mieç di domande, ancje a vôs, al ufici competent di formâ l'at finâl dal procediment o di tignîlu par simpri.
2. L'interessât al à di indicâ i estremis dal document ogjet de domande, o i elements che a permetaran di individuâlu, e provâ la sô identitât e, se dal câs, i siei podês di rapresentance.
3. La Aministrazion e cjape in exam subit e cence formalitâts la domande, le acete, e indiche la publicazion che e conten lis notiziis, e mostre il document, e tire fûr lis copiis, e dut ce che al covente.
4. Se la domande le fâs une Aministrazion Publiche, le presente il titolâr dal Ufici interessât o il responsabil dal procediment aministratîf.

5. La domande di acès si pues presentâle ancje par mieç dal Uffici Relazioni cul Public.
6. Se la Aministrazion, daûr dal contignût dal document demandât, e viôt che a esistin sogjets cuintrinteressâts, e invide l'interessât a presentâ une domande formâl.

## **Art. 5**

### **PROCEDIMENT DI ACÈS FORMÂL**

1. Se la Aministrazion no pues acetâ subit la domande in vie informâl, o se a vegnin fûr dubis su la legjitimazion di cui che al à fate domande, su la sô identitât, sui siei podês di rappresentance o su la acessibilitât dal document, e invide l'interessât a presentâ domande formâl.
2. Pe presentazion de domande si pues doprâ il modul 1) alegât a chest regolament.
3. Pal procediment di acès formâl a valin lis disposizions dai comis 2, 4 e 5 dal art. 4.
4. Il procediment di acès al va sierât drenti di trente dîs, pal art. 25, come 4, de Leç dai 7 di Avost dal 1990, n. 241, a partî de presentazion de domande.
5. Se la domande no je regolâr o no je complete, drenti di dîs dîs la Aministrazion e à di visâ par timp cui che le à fate a mieç di raccomandade cun avîs di riceviment o cuntun altri mieç che i 'ndi siguri il riceviment. Il procediment al torne a començâ apene che l'interessât al presente la domande juste.
6. Al è responsabil dal procediment di acès il dirigjent o il funzionari di lui incaricât, che al sta da cjâf a la unitât organizative che e forme il document o che lu custodîs.

## **Art. 6**

### **BON ACET DE DOMANDE E MODALITÂT DI ACÈS**

1. L'at di acet de domande al indiche l'uffici, la sô direzion, ce timp che al è proviodût (no mancul di sîs dîs) par cjapâ vision dai documents o par vënt une copie.
2. L'acet de domande di acès a un document al da ancje la facultât di acès a chei altris documents leâts e che a fasin part dal stes procediment, fûr che pes ecezions di leç o di regolament.
3. L'esam dai documents si fasilu tal uffici indicât tal at di acet de domande in orari di uffici, e se al covente a la presince dal personâl adet.

4. Si pues vê une copie dai documents paiant il cost di riproduzion, € 0,10 par façade. La Zonte Provinciâl e inzorne ogni an chest impuart in relacion a lis variacions dal cost di riproduzion. Par mancul di sîs copiis, il rimbors nol è dovût. Ents e Aministrazions publichis a puedin vê copiis di bant. Su domande dal interessât lis copiis si puedin autenticâ. Tal câs de furnidure su supuart informatic dai projets in apalt aes ditis che a fasin domande, il rimbors des spesis lu fisse la Zonte Provinciâl cun deliberazion.

## **Art. 7**

### **LIMITAZION E DIFERIMENT DAL ACÈS**

1. La Aministrazion e pues limitâ l'acès a un document o platânt cualchi contignût, se e à di salvâ la riservatece di tierçs e se lis informazions no son impuartantis par cui che al à fate la demande, daûr valutazion dai elements declarâts dal interessât te sô domande di acès.
2. La Aministrazion e dispon il diferiment dal acès se al baste par sigurâ une tutele temporanie dai interès che si fevele tal art. 24, come 6, de L. n. 241/1990, o par vuardâ esigjencis specifichis sôs, soredut te fase di preparazion dai proviodiments, in relacion a documents che se si ju rint publics a podaressin comprometi il bon funzionament de Aministrazion.
3. In detai, la Aministrazion e dispon il diferiment dal acès cun riferiment:
  - a) a la liste dai sogjets che a àn presentadis ufiertis tes garis di apalt a procedure vierte, fin che nol scjât il tiermin ultin pe presentazion des ufiertis;
  - b) a la liste dai sogjets che a àn fat domande di invît o che a àn pandût il lôr interès a cjapâ part a garis di apalt a procedure sierade o negoziade, a la liste dai sogjets invidâts a presentâ ufiertis e a la liste dai sogjets che a àn presentadis ufiertis, fin che nol scjât il tiermin ultin pe presentazion des ufiertis;
  - c) ai ats e ai documents relatîfs a proceduris di garis di apalt fin a la adjudicazion;
  - d) ai ats e ai documents relatîfs a la selezion dal personâl fin a la conclusion;
  - e) ai ats e ai documents di subprocediments di competence di comissions o di coleçs consultîfs fin a la adozion dal proviodiment di aprovazion de bande de Aministrazion e fûr che pes ecezions previodudis de discipline di ogni procediment.
4. L'at che al dispon il diferiment dal acès i 'ndi indiche la durade.

## **Art. 8**

### **ESCLUSION DAL DIRIT DI ACÈS**

1. La Aministrazion, valutâts ben i elements a sô disposizion e il câs specific, e pues dineâ l'acès a chescj documents:

- a) ats e documents che a jentrin tes categoriis gjenerâls dal art. 24, come 1 de L. n. 241/1990;
- b) ats e documents che a van cuintri di interès impuartants come chei individuâts da art. 24, come 6, letaris a), b), c) e) de L. n. 241/1990;
- c) documents che a rivuardin la vite private o la riservatece di personis fisichis, di personis juridichis, di grups, di impresis e di associazions, cun riferiment soredut al lôr interès epistolâr, sanitari, professionâl, finanziari, industriâl e comerciâl, ancje se chescj dôts ju dan i stes sogjets a la Aministrazion, cuant che:
  - c.1) la cognossince dai dôts e puedi puartâ dam o prejudizi grivi e cence rimiedi ai sogjets des informazions contignudis tai documents;
  - c.2) i sogjets che a dan lis informazions a vedin evidenziât che chestis informazions a son ametudis a tutele speciâl, par disposizions di leç.

### **Art. 9**

#### **TUTELE DE RISERVATECE**

1. Dut câs, la Aministrazion e garantîs l'acès ai documents aministratîfs che a coventin viodûts par curâ o par difindi i interès juridics di cui che i fâs domande.
2. Tal câs di documents che a àn dentri dôts sensibii o judiziaris, l'acès al è permetût dome se al è indispensabil e dentri dai limits previodûts dal art. 60 dal decret legjislatîf dai 30 di Jugn dal 2003, n. 196, in câs di dôts che a pandin il stât di salût e la vite sessuâl.
3. In ogni situazion dulà che si pensi che l'acès al puedi fâ dam in relacion ai câs previodûts dal art. 8 precedent, la Aministrazion e valute se l'interès o il drit pal acès al pese tant o plui de tutele de riservatece dai elements contignûts tal document.

### **Art. 10**

#### **DOMANDIS NO ACETADIS**

1. Il dinei, la limitazion o il diferiment dal acès ju dispon la Aministrazion cuntun proviodiment dal dirigjent competent o dal funzionari di lui delegât, che al da motivazion dal dinei o des limitazions imponudis al acès, e al indiche lis resons di fat e di drit, ancje cun riferiment ai câs individuâts tal art. 8 precedent.
2. Il dinei al acès al pues ancje jessi tasût. Ta chest câs, come che al dispon l'art. 25, come 4 de L. 241/90, passâts trente dôs cence rispueste, la domande si intindile no acetade.

### **Art. 11**

#### **DOMANDIS DI ACÈS DI SOGJETS CHE A FASIN I INTERÈS DI PLUI PERSONIS**

1. Lis disposizioni su lis modalitâts dal dirit di acès che si fevele ta chest regolament a valin anje pai sogjets che a fasin i interès di plui personis.

## **Art. 12**

### **ACÈS PAR VIE TELEMATICHE**

2. Il dirit di acès si pues esercitâlu anje par vie telematiche, pal art.13 dal D.P.R. 184 dai 12.04.2006. Ta chest câs, cemût mandâ lis domandis e lis sottoscrizioni relativis al è scrit tal art.38 dal DPR 445 dai 28.12.2000 e tes modifichis seguitivis, tai art.4 e 5 dal DPR 68 dai 11.2.2005 e tal D.Lgjs. 82 dai 7.3.2005 e tes modifichis seguitivis.
3. La partecipazion al procediment aministratîf e il dirit di acès ai documents aministratîfs si ju esercite cul ûs des tecnologjiis de informazion e de comunicazion daûr di ce che a previodin i articui 59 e 60 dal DPR 445 dai 28.12.2000.
4. Tal câs di acès a mieç di struments che a permetin al interessât l'acès imediât a lis informazions e ai documents, la Provincie e determine lis misuris organizativis e lis normis technichis, comprendudis lis modalitâts di identificazion dal sogjet che al fâs domande, che a garantissin il dirit di acès ai documents aministratîfs, tal rispjet des disposizioni di leç su la tutele de riservatece dai dâts personai.

## **Art. 13**

### **JENTRADE IN VORE**

1. Chest regolament al jentrarà in vore la dì dopo de ultime di publicazion de deliberazion di aprovazion.

**MODUL 1)**

Al Dirigjent  
Dal Servizi \_\_\_\_\_  
\_\_\_\_\_  
Provincie di  
P O R D E N O N

**OGJET: L. dai 7 di Avost dal 1990, n. 241. Acès ai documents aministratîfs.**

Jo \_\_\_\_\_  
nassude/nassût a \_\_\_\_\_ ai  
\_\_\_\_\_  
resident a \_\_\_\_\_ in vie \_\_\_\_\_ n. \_\_\_\_  
tel. \_\_\_\_\_/\_\_\_\_\_, daûr dal art. 22 de Leç 241/1990,

**O DOMANDI**

di podê cjapâ vision/ di vê copie di cheste documentazion:

\_\_\_\_\_  
\_\_\_\_\_  
\_\_\_\_\_  
\_\_\_\_\_

O precisi che cheste domande le fâs par chescj motîfs:

\_\_\_\_\_  
\_\_\_\_\_  
\_\_\_\_\_

date \_\_\_\_\_

---

(firme)